



Pred Sudom BiH iznova je počelo suđenje Srpku Pustivuku, optuženom za zločin protiv civilnog stanovništva počinjen na području općine Ilijaš. Uz saglasnost strana u postupku, u spis su unesene optužnica i ranije iznesene uvodne riječi Tužilaštva BiH, nakon čega su preslušani iskazi zaštićene svjedokinje S1, te iskaz Zijada Selimovića.

Svjedočeci u korist Tužilaštva, Selimović je 9. novembra 2010. godine ispričao da je optuženi Srpko Pustivuk predvodio grupu naoružanih ljudi koja je napala njegovu kuću u maju 1992. godine, kada su stradali njegov brat Zahid i otac Uzeir.

Tužilaštvo BiH tereti Srpka Pustivuka da je, kao pripadnik Stanice javne bezbjednosti (SJB) Ilijaš, tokom maja i juna 1992. godine u selu Gornja Bioča (općina Ilijaš), s drugim pripadnicima vojske i policije Srpske Republike BiH, učestvovao u napadu na civile, među kojima je bilo i djece. Tom prilikom je, smatra Tužilaštvo, ubijen jedan a teško su ranjena tri civila.

Pustivuk se također tereti da je, kao milicioner-specijalista u SJB-u Ilijaš, učestvovao u hapšenju i zarobljavanju civila Bošnjaka, koji su potom odvođeni u druge logore i objekte za zatočenje.

Suđenje Pustivuku prekinuto je 10. novembra prošle godine zbog bolesti jednog od članova Sudskog vijeća, koji je nakon tromjesečne pauze zamijenjen, a zbog čega je suđenje krenulo ispočetka.

Na narednom ročištu, 22. marta 2011. godine, biće preslušani iskazi još tri zaštićena svjedoka Optužbe.